№ 48 (1299) Ас потты 29 хатд 2025 тад

Рут ясаң уятман юш пуншантал едды

Кашң тал там порайн, Ас потты тыдащ 26-28-мет хатдатан, Пулнават вошан ашкуда няврэмат «Арктической олимпиадая» актащилат. Па талат пилан артадаман тампуш аршак няврэм ёхтас, хольман педа йи хоята йис. Ямал мув тумпийн Красноярской край, Долгано-Ненецкой автономной округ, Коми Республика.

Ин муң туняд ёхтыдыйм няврэмат пидан па уйтантысув. Туняд эдты вантман дув ин ант едэмдат, таканшак потардат, хоты там уйтантопса манад, иса уйтдат. Щит шеңк ям.

Кашң тал Приуральской район Охсар пухад ашкуда-интернат эдты Ольга Николаевна Пандо няврэмат тутдыйд. Рут ясаң щиран касты хара Павел Иванович Вэненго ёхтас, дув нийдмет классан уталтыйл. Рут ясңал шеңк яма уйтдадды, ант тахрамтыман потрад туңа-щира па ошаңа-щащаңа туслы Аңкел-ащел тащ хотан яңхдаңан. Щи веран, ханты мир удапса едды туты хоятдув кутан хонна ханты ясаң хулты рахал.

Краеведение щиран Анжелика Семёновна Кондыгина касты ёхтас, дув яртъянмет классан уталтыйл. Там едпийн няврэмат ёдан дэщатысат, ин куман масайт потар ханшапты па хоятат ещал ясан ястаты. Анжелика

потар тувмал тумпийн хонна лунтар лунтас, тухал хоятэм сэмъйиңкад хонна эсдамтыйс. Щикем щи дув ястам ясандад

сам хара лонксат.

Аратадан там уйтантопсая няврэмат Ямал мув 95мет тада, па Водан Ляль порая потрат дэщатсат. Щишан, кашң хоят дыпийн, сам вуран ляль шук верат хонна дыднат. Кашң хоттэд эдты рутдад Водаң Ляля манылысат, па щи юпийн па атаң-хатд

Николаевна Пандо, Анжелика Кондыгина касты хара ёхатсат.

Павел Вэненго, Ольга

рупитысат. Ун овращдад па щащилал элты ищипа хуллысат, муй хорпи шукаң пора ус.

Там касапса мохты ныда, муй хорпи рупата районат па вошат хуват няврэмат утадтаты хоятат вердат. Сам хошиман утадтыты няврэмдад пидан рупитдат,

касапсаята тутдылдад. Па дапатан этты газетайн ханшдув, хоты иудтыя там «Арктической олимпиада» манас, хойтэм нох питас. Там уйтантопсаята пидтащиты няврэмат едды хатдатан, ун тахаята уталтыты мантэл порайн тата нох питам верэд ищи дунатда. Шишан, тухал няврэм хонна экзаменды едды уталтыты вуты верытда. Щи веран едды юш пуншантал, па аратал вер кентат манты питад.

Няврэмата ястадув, ищиты едды яма утадтыты, кашң касапсая пидтащиты, муван-йиңкан удапса па рут ясцан яма уйтты. Уталтыты нэңата юр па щём понты ядап няврэмат водаң касапсаята тутдыты ураңан.

> Аллина Тоярова ханшам потар

Дорогие женщины, мамы!

День матери - это праздник, который идёт от сердца к сердцу. От тех, кого вы растите, к вам - мудрым, сильным, бесконечно любящим.

Под вашим крылом рождаются новые поколения северян - талантливых, целеустремлённых, верных своей земле. Вы воспитываете в детях ту самую крепость духа, честность и уважение к традициям, которые испокон веков отличали жителей нашего региона. Сегодня каждый четвёртый ямалец - ребёнок. Наш округ находится на первом месте в Уральском федеральном округе по коэффициенту рождаемости и на третьем в стране. Благодаря вашей мудрости, заботе и безграничной материнской любви в ямальских семьях живут согласие и уют. Во многом именно вы делаете наш округ территорией счастливого детства и крепких семейных уз.

Дорогие мамы! Желаю, чтобы ваши дети радовали вас успехами, в домах звучал смех, а в сердцах жила уверенность в завтрашнем дне. Крепкого вам здоровья, душевного тепла и гордости за тех, кого вы воспитали.

> Губернатор Ямало-Ненецкого автономного округа Д.А. Артюхов

Дорогие женщины!

Поздравляю вас с Днём матери!

Мама - это самый родной и близкий человек, чьё сердце становится для нас самым тёплым домом на земле. Её любовь - это тихая гавань, куда мы возвращаемся за утешением и поддержкой, это вера, которая окрыляет, и мудрость, которая направляет. Сколько бы лет нам ни было, мы навсегда остаёмся детьми, жаждущими услышать мамин ласковый голос и почувствовать её безграничную заботу.

Дорогие мамы! Выражаю искреннюю признательность за ваш неустанный труд, материнскую мудрость и безграничную любовь. Вы главный ориентир в жизни своих детей, основа крепкой семьи и опора нашего общества. Ваша способность беречь семейный очаг, передавать детям традиционные ценности и поддерживать их в любых начинаниях заслуживает самого высокого уважения.

Пусть ваши сердца всегда будут наполнены спокойствием, гордостью за своих детей и светлой радостью. Пусть каждый ваш день будет озарён улыбками близких, а дом полон смеха и гармонии. Крепкого вам здоровья, душевного тепла, семейного благополучия и счастья!

> Председатель Законодательного Собрания Ямало-Ненецкого автономного округа С.М. Ямкин







Няврэмдан щутщаты ханшдтыядан

Ешауд ядап тад ёхатад, хоятат катхощъян хатд сыс щутщаты питдат. Щи хатдат ашкуда няврэмат шенк даваддат. Тампуш Тюменской областя няврэмдад яммадтыман щутщаты китты мохет ван хатдап тыдащан заявка нэпек ханшты верытдат.

Ядап тадан энамты мохет Тюменской областян худам лагерян даваддайт: «Олимпийская ребячка», «Алые паруса», «Остров Мадагаскар». Щутщаты манты ураңан, «Госуслуги» хоща ЯНАОтдых порталан заявка ханшты мосад. Льготной категория тайты мохет ван хатдап тыдащ одаңмет хатд эдты нэпек китты питдат, па хоятат ван хатдап тыдащ нядмет хатд эдты. Заявочной кампанияйнан кинамтак адаңсахат яң щёс эдты питщадайнан.

Щутщаты хара дапат-дапатхощъян тад доват няврэмат манты верытдат. Путёвкайт уранан ох сохаптаты ант мосад, туп манты юшдад сахат. Няврэмат, хой хоттэддад шимад ох шитдат па хой ащед мосан антед военослужащия уд, тад сыс йи пуш юшад тадан тэдан сохаптаты кеша охан мада. Льготной категорияйт эдты айкед детский отдых порталан вантты рахад.

Щутщаты порайн, няврэмата шеңк каш пора хайты питад. Дув, яха пидтащман, камн проектат вердат, ёнтты, касты питдат. Щи сыс ар ядап айкед хон мувед, удты хоятат эдты нопса пондат.

Валентина Рохтымова ханшам потар

Актащапса маныдыйс, верытам мохем мойдапса шитыдыйс

Хащам дапатан «Российский Север» форуман энамты няврэмат Новый Уренгой вошан уйтантысат. Хольмаң модтас мир рут нядъяң педа вет субъект эдты ёхтыдыйс. Хащам тадатан ханты мирэв эдты щий артан айдат мохидув пидтащидат, мойдапсайт ёша пайтыдыдат.

Там уйтантопсайн нэмат ястасайт, хой Росмолодёжь. Гранты щиран ох шитас. Аратадан дапат проект нох питас. Ойң хоятдув Ямал, Бурятия, Хакасия, Якутия, Хабаровской край па Коми Республика эдты уддат. Ямал мув эдты Анна Сотруева па Владимир Сэротэтто нох питсацан.

Владимир Сэротэтто «Овс муваң нёд эсадты ху» нэмпи проект пидан нох питас. Дув нумасад юхдат на нёдат дутты. Щи веран Тюмень вошан удты студентат пидан касапсайт верыдыты.

Ханты мирэв эдты Анна Сотруева нох питас. «Ямал ар мираң хоттэд» нэмпи проектад мира этадтас. Щи веран худамсот ветъяң педа нийд щёрсаң сертификат ёша пайтас. Папуш Россия Президент партам щиран хон мувев мират ияха удты Тада постаман уд. Щи веран там проект тохи шеңк рахад.

Анна Николаевна каматса ясаң ястас, хоты сахат там постам верал рупитты питал: «Там проект верты порайн муң нумаслув па хон муват, па



мув суңат эдты ёхтам хоятата потарты па альты хоты Ямал муван Овс мув шимдаң мир хоятат уддат. Дув пиддадан мастер-классат верты питдув: сак эдты каратты, вой пун эдты пормасат верты. Потарты па альты муй хорпи ханшет тайдув. Щи веран мосты пормасат ин мойдам охдуван иса дутты питдув. Там проект манты сысад, няврэмат утадтыты порайн вердэв. Ашкудайн па колледжан утадтыты няврэмат, дув хоттэд хоятдад ураңан

шоши мир удапса музейт мохты этадтадув. Канащ пухда, И.С. Шемановской вантопса хота па Саран курта тутдыддув. Муң верты рупатаев пидан вош тыйм Хатадан, турамсот ун фестивалят манты порайн, няврэмат сайдаты Хатадан ищи пидтащдув. Нумастэман, там постам рупатаев паты унты тудэв па кентат манад».

Ин аратад айдат ёх дув мув суңдада ёхды мантсат. Там уйтантопса эдты номас вусат, муй хорпи проектат пидан папуш этты рахад. Муң ханты няврэмдув ищи ат дэщатыдат. Номасан тайты ям вердад нэпека ат пондаддад, ханшдаддад. Верты даңхаты вердад ат тыйдат, миран ат вантдайт. Щи веран ханты мира ун онтас папитад.

Аллина Тоярова ханшам потар

Социальной контракт онтасна ёра вер пунста рахал

Ветъёңкем Ямал мув нэңху социальной контракт онтасна ёра вер пунссат. Щимащ мера ясна пайтта веритдат нэңхэт, хой ропата кансад, индивидуальной предпринимателя йита па вай энмадты вер пунста дытд.

Социальной контракт ораңна маты ох нятапсы, тынал пирыты вер эвалт лайта питал. Щиты, дув вер пунста дытты нэңху, ипус 350 щёрас ясна пайтта веритал. Щи охлал, ропытман тайты пормасат лотты па рекламной услуга сохаптаты тахайна пасатта рахал.

Ропата кансты сыс касң нэңху тыдащ ипус 26 молтас щёрас содкувая сохаптата питда. Мет алаң нятапсы мохты мада, щи юпина холна холам тыдащ сыс ропытта этты юпи-

на. Тампус соцзащита эвадт 120 ямальской нэңху нятса.

Холна йи йит — личной подсобной хозяйство тайта. Щи ораңна катсат щёрс содкува сытта веритда па теплица, энмадты ваят, щищкет па арендая вуйм мув тын сохаптаты тахая тайта рахлат.

Щимащ мера ясна пайтты ораңна — тыдащ сыс сытты ох прожиточной минимум эвадт вуд олта ант масд. Бизнес-план дэщатта па нэман верам платформая тест манта.

Соцконтракт заключение хансты ораңна «Госуслуги» портал хуват па МФЦ хоща заявление мата рахал.

Вера Лонгортова хансам потар





«Йи дэр няврэмат» уйтантопса верыдыса

Хащам ятан Тюмень вошан «Финно-угорской па самодийской хатдат» мантсат. «Йи дэр няврэмат» нэмна понман ус. Дув рут ясан шавиты щиран Международной десятилетияя постаса.

Там уйтантопсая Югра, Ямал, Удмуртия, Марий Эл, Екатеринбург, Тюменской область хоща удты хоятат пидтащисат.



Натан вош элты Ассоциация «Ямал потомкам!» филиал хоща донам хоятат яңхсат. Дув «Торфянник» ДК хоща ун вантопса алидысат, щита удты хоятат ураңан дэтотаң пасанат дарпитысат. Щита рахас нёхи, худ эдты верам турамсот дэтот, мурах, нянь уңда хошкиты.

Дув тумпидадан, аратад финно-угорской мир эдты, ёхтам хоятат ищи дув тусдад эталтысат. Ямал мув хоятлув саклопсат, аканят па па хорпи тус ёшан верам пормасат алидысат. Валентина Тибичи, Вера Эгамова там вантопсая турамсот пормас дэщатсат. Щи тумпийн ёхтам хоятат ураңан мастер-классат алидысат, хоты туңа-щира вератты мосад.

Водан уйтантопса верам порайн Тюмен-

ской дума эдты Лариса Цупикова ёхтылыйс, Тюмень вош Администрация

эдты Платон Осоткин ясаң вуйдыйс. Каш верты харат верам порайн няврэмат арысат, яксат. Муң муваң нэңдув ищи ёдта ант дойсат. Галина Граблевская ханты ар сухтыдыйс, Антонина Салиндер ур ясанан, сыяна Ольга Антипина саран ясанан арыйс.

Кашң хатд атэд мир удапса альман уса. «Духсат уйтантопса» удмурт мир верыдысат. Щи уйтантопсайн Галина Граблевская потартас, хоты Ямал муван шимдаң мир хоятат уддат. Ханты мир пормасат ёхтам хоя-

тата алилыйс. Кашн хатл актащийм харан, кашң рут мир дув яснадан потартас, арыйс, монщас. Кимет хатална марий мир «Мари кас» верыдыйс. Щита рахас марий думатты сохат вантты, арат худантты, дув мир якедан якампты.

Тамащ уйтантопсайт шеңк мосдат. Па мувата яңхман вантдув, хоты па

мир хоятат уддат. Муй хорпи ям верат дув тудат, ясңед муй юр понман шавидат. Ванты, хащам ятан вошан удты хоятат шимад питсат рут ясанан потарты. Па мув эдты ёхатты миратан муң удапсаев ванан тайда. Ханты мир тайты ернасат думатдат, ханты ар сухтапдат. Муң ханты мирэва удапсаев па ясңев едды туты мосад, такан шавиты, па мир хоятата муңева тутыя!

> Галина Граблевская ханшам потар







Там QR-код хуват донаты па вантаты, муйсыр нётопсайт СВО хоща удты мохета мадайт. Щи тумпийн нэңдада, няврэмдада, аңкидада па ащидада ищи нётопса вуты рахал.





Нэңхэт лечитмал томпына самал ар педа хойс



Татьяна Гавриловна Ендырева

Ашкода етсамад юпина, Татьяна Гавриловна Пулнавт медицинской училища етсас па Приуральской район Охсар похална олта манас. Щита дув леккар хатна ропытта питас. Аратэдна нидъён тад ай леккар ропата верас. Итта пенсина ол.

Нэңхэт лечитмал томпына, самал ар педа хойс. Арат па монщат пидна Татьяна Гавриловна Ендырева олтад хуват лохсана ол. Йис потрат па монщат ай тэдна ащед эвадт холантас, амэдна па хорам ханты аратна ариса.

Вулды ювмал юпина, дув ищи амэл па ащел иты арийл, мала кем арат ай олмал пора эвадт номал, арпелак ар щирадна хансал.

«Ма ай тэдна аридам, номсамна хыщас хоты амэм арийс, ма па вудды ювмем порайна, самам иёлты арита дытас. Арат ханста 1993-мет тад эвадт питсам, ардам ханстэмна - ёр Овс мув хорам тахайт, Кев, щита касдыты нэңхэт, хаттэд нэңхудам, нявремат, энмам мувам, мув хорас, самамна омащ похлам, щиты ванна олды Ас эвадт вудам. Айна-айна хансантман итта мули ветъён молтас ар ханссам.

Щиты олман ма ханты арат ариты «Овс мув нэ» группа хоща арита вахсайм, айдта ныңдам пидна ариты арат ханста питсам. Муң ивейна Охсар похал емаң хатдатна нэңхэт ораңна ариду, Дорвош районна яңхлу. Камантсы пус Пулңавтна шоши мир нэңхэт ораңна верты емаң хатдатна пидтащису. Щимащ уйтантопсайт етсаты юпина, «Сборники песен народов Севера» этдат. Дапатмет пус этам сборника ма

Татьяна Гавриловна Ендырева сэмна питам па энмам мувал Суп ёхан сылна Катравош хошанна ол. Ашел Гаврил Алексеевич Тарымов олмал хуват совхозан ропытас. Амэд Мария Ивановна Ковшина ротд Вандиязы ханты курт эвадт манд. Аратэдна дув хаттэдэдна холамхощъён няврем ос, дув мет ялта. Арпелак, ай олман антамми йисат.



Татьяна ай олмал порайна амэл пилна.

хансам ардам лоңсат «Ворна ими», «Амы пущщи ар». Щи томпына йи матты номера вуд апэм хансам ар па мун хаттэду йис потрат ищи щита лоңсат. Холна, самамна сэңк хасам, щи сборника касң автор, фольклорной коллективат, солистат пущщи еса хаснман ол, нэңхэт сборник ясна вутэл порайна, ощта масдат хой хансам арат дуңатта питдат. Холна сэңк дытдам ма хансам ардам щиран диск хоща дэщатта.

Итта лолан энмам мувдамна янхта. Маса хонды кепа веритдам щи питта, итта щит топ ма эвадтэм лайд. Самам хонды такан ки дытта питд, адт янхлам», - Татьяна Гавриловна лавас.

Алаң ийикед Олег Никифорович Кельчин Афганистанна манам ляльна парас. Сэмна питам па энмам мувадна туса па щита щамалтса. Дув эвалтэл кат йикал хыщас Андриан па Олег. Вуд йикад Пулнавтна ол па ропытал. Ай йикал Белоруссия – Брест васна маныдыйс.

Ай похална нын элты отща олта шёкат, йиңк масд, юх масд, щитна дув киметты ях хоща манас. Щидта кат эви тайс. Аратэдна Татьяна нид няврем энмадтас.

Итта Татьяна Гавриловна ветхощъён хиды энмадта нятад, хидыдад Кев сыд ханты ясан педа онттадды. Иикнидад мостаднан кепа, топ лавта нядамдан ант кердадат. Щи лампа омащ ясңу ант таптал ораңна энамты нявремат пидна ханты ясаңна потартта масд.

Татьяна Ендырева лавты ясаңна, сэңк ям Охсар похал ашкодайна нявремат ораңна ханты ясаң урок туда.

Анта топ аритал па арат ханстал ораңна майдаптада, ай леккарра ропытам таддад ораңна ищи майдапсэт тайд.

> Вера Лонгортова хансам потар



«Овс мув нэ» фольклорной группа ариты пидныңдад пидна кадаңаң нэңхэт емаң хатдатна ищи аридат.

Рут муведан ротая уддат

Тащ хотан удты хоятат дув ёшдадан дувидад удты кеша муй иса вердат. Там йисан мосаң еша ядап мутраята, машинаята питсат. Туп ищипа арпелак вердад ёша-кура верты мосдат. Щишан вуды хотан туп каркам па юраң хоятат яңхдат. Ванты, хоят еша лэнь ки, вудыдад лакки мандат, хотад потда, хорам ханшең думатты сох ант думатад, пормасдад понты ураңан ухал тайты ант питад... Щишан вутан кашң ху, муй нэ дув верад торды вердадды ки, удапсайд иса туңа-щира манад.



Вуды шавиты – щит ма верэм

Вуды тайты тахайн икет тащ шавидат. Щит дув верэд. Тащед иса яха ат ус па тумтака нюрматан па щахратан дарпилыйс. Щишан дув иса войдал вантман тайдадад. Дуңан йи хоятан атаң-хатд шавиддад, тадан хатд сыс ар хуйн яха акатдаддад, дэтот тайты тахая воштаддад. Ин тащаң ёх Кев эдты ханты мува ёхатсат. МСП «Мужевское» ветмет тащ куща ху Станислав Лонгортов рупитты тащад касдаптыты верад эдты айкед

верас: «Ма ар тад вуды хотан рупитдам. Вуды шавиты – щит ма верэм. Едпи иса вудыйн таща наврадтысув, куд донщаң тахайн дохан, дуңан кеввурат хуват куран шушилысув. Ин мув донщаң па так тахайн, арпелак донщхопан яңхдув. Щиты кеншак тащ яха акатты, ухда кирты вудэт ант шукащдат, ху дохан хухатдыман ант метад.

Ин муң тал хотволдува ходна касаллув. Там ванан тащев Меңк нюрма ёхтас. Тата пушас тайдув, щахашак вудыдув дуңатдаддув па хорты войдув атэл отрлаллув.

Щадта айн-айн вошат лепа мандув. Ханты мува тащдув воштаты кен, дув тохи сора мандат. Кева воштаты давартшак, вудылув иса тал щахардала ёхды кердадат. Щишан каматса хоятан воштаддув, иса вантман тайдалдув. Ин ходна донщ ухад, вудэт нёта хирдат. Тадан дув артаншак порвой дэты питдат, ванты, кен мощатты.

Ухадан ин щикуш тащ шавиты шимал яңхлув, касалтэв порайн ищипа вуды кирты мосад. Щишан муң дуңан ухад вердув, хун пора тайдув. Щи порайн ёх таща итан-итан яңхдат. Муң бригадаеван хут ху рупитал, вет хатд ёдан уддув, верантты кум шитдув. Манэман, донщхопан щикуш сора мандан, дув муй ант рахты порайн шукадыты верытад. Ухадан, куш айдта мандан, ищипа мосты тахая ёхатдан».



Вуды хотан рупитты нэңат ищи шеңк ар па даварт рупата тайдат. Дув хотдадан сыстам па хошам. Тал-дуң сыс дув икилал, няврэмдал пидан иса хорам, хошам модщанан, сахан, вайн янхдат

Каркам нэ хоттэд педа умащ вантты


– вантты умащ. Тащ хотаң нэңат верат эдты Юлия Лонгортова МСП «Мужевское» нядмет тащаң нэ потартад: «Вуды хотан яңхман вер ар. Тадан удты щират эдты еша потартдам. Нох киддам тут аддам, мохидам адаңсахат шайн йинщдтаддам. Ёх дойдтыты хара мандат. Щадта рамак пуляң дэтот кавартдам, донща яңхамтыдам. Хун ёхан, сойм пунадан уддув, омлэп эдты йиңк аддув. Хатд новия йиты порайн, туп матты ёд ёнтты рахад. Ин хотдуван станция тайдув, нови тут уд, кум ки тайдан, куш етан ёнтаса.

Тадан карты кур адты ар юх мосад. Ёхдуван юхан тудаюв, шупидаюв. Щадта хот пиднэнем пидан халытдаман. Хатд сыс каматса адтэдан ёхи аддадаман. Ин ям, юх эватты «Дружба», юх халытты ун дайм уд. Едпи ащем, антем хотан яңхманан, даяман юх ил пайтты мосас, ёхи вулэн ухадан тадты. Щадта кат пелак эдты таддыты картыйн шупиты. Халытсаддув щи порайн ищи ад даяман. Ин кеншак удты питас.

Етан икилув ёхи ёхаттэдан модщандад, вайдал сорадтдув, хой сосдат, татадты мосад. Ядап вай идаман понты. Щиты тыед-тохед катдантытэн эдты, аңкармадан - етная ювмал».

Щиты щи мохет хатаддад сыстам па хорам муван мандат. Дув педаед вантман самен аматад, ханты удапса ант ёрэмаса. Щиты щи ханты хоятат рут муведан ро-

Валентина Рохтымова ханшам потар





Дорвош район йис удапса



Ешауд округев тыйм хатдад постаты питад. Там лопасан потрэм тудэм, хоты Дорвош район тыйс, хун округева донадса, муй мув суң хося хантылув мув си едпийн дуңтасас па хоты ин сита удты хоятат удапсаед манал.

Хун округев тыйс

Округев ван хатдап тыдась яңмет хатадан 1930-мет тадан тыйс. Си порайн дув Ямальской (Ненецкой) национальной округа нэматман ус. Водаң воша Обдорск курт дунтасас. 1933-мет талан па Пулнавт курта нэматса, 1938-мет тад эдты вош нэм тайты питас.

Округев яңкем тал сыс каматса областят хося пидтасьман ус – Уральской, Обско-Иртышской па Омской. 1944-мет тадан Тюменской область хося лунтасты питас. 1977-мет талан автономной округа йис. 1992-мет тадан Федеративной договор ханшман ус, си тал эдты Россия хон мув субъекта дуңтасад.

Ходта хантыдув удты мув дуңтасас

Хой одна округеван ус, ар тахайн ар сирн ханшман уса. Ма па каматса ясан вердам. Хой мосаң ун хоятдадан ястыдыса, хоты Дорвош район, округев тыйс, газетаева матты ясаң верты верытдаты.

Хутхосьяңмет нупат (век) порайн, Дорвош район Овс мув педа удты мувдад, там порайн сит Ёханкурт, Дорвош, па Приуральской район Обдорской княжествая дунтассат. Удты мув кимаддад хатд омасты пелакан Кев унты усат, ным муван -Ямал мув тай, халэват пелакан – Надым вош унты. Си юпийн си тахайт Русской Царства хося доңадман усат. Водаң воша Пулнавт ус. Хутхосьянмет нупат унты си тахайт, хувн удтэд ураңан, ёрая усат.

1563-мет тадан Обдорской канасят Кучум хон хося пидтасьсат. Сит Чингисхан хидэт хиды, Сибирской ханство канась ус. Кучум ики Иван Грозный хона тал сыс йи сёрс нёхас мийлыты верал ус.

Си порайн казачий атамана удам хоят Ермак Тимофеевич Сибирь вуты манас, Топол ёхан хося Кучум хон хоятлал паятсэд. Си пора эдты хатанят па остякат ясак дуведа мийдыты





Муй пора эдты Дорвош района йис

1930-мет тадан Хон мув Центральной Исполнительной Комитетан партапса верман ус, нийд национальной автономной округ верты.

Округев худамхосьян муниципалитет тайд. Дув кутэдан Дорвош па Приуральской районцан. Ханты хоятдув арпелак сита уддат. Кашң симась таха дув герб, вотвой тайд. Муйн мувал тащан, сита альман ул. Дорвош районан Кунавт заказникан торат уддат. Катра порайн вой энмалты тахайт усат, арсыр войт энмалтысайт. Йис пора эдты Ун па Ай Асан удты хоятат хул велпаслыман усат. Сишан герб па вотвой эдты тор, лэпак па худ хоран ханшман уллайт.

1937-мет тад унты Дорвош район Остяко-Вогульской мир ёх округа лунтасас. 1944-мет тадан Омской область эдты округева донадса. Муя Дорвош района нэматса? Хун Обдорской района донам тахайт ядпитсайт, Дорвош курт водаң воша понты вер ус.

Си едпийн, 1927-мет тадан ядап тад тыдасян Обдорской районан Дорвош туземной совет Дорвош куртан ус. Сядта, 1934мет тадан, хун национальной округат Омской областя мийман усат, водаң воша Мужи курт понтса.

Там пора удапса

Ин Дорвош район – сит хорам, тащаң мув. Хоятат удапсаед па муватан удты мохет иты даварт ус. 1930-мет тадатан Дорвош мува хон мув суңат эдты ар хоят, тадаң хоттэдатан, вурты ёхан шук туты китыдысайт. Арпелак ёх сита удты хасьсат.

Водаң Ляль манам порайн, район эдты 1634 хоят ляля китыдыса, 494 – антома йис, 137 - веккеша ушас. Ляль етшам юпийн, сита удты хоятат худ, вой ведман усат, вуды шавиман рупитсат, няврэм энмалтысат па уталтысат, улты хотат омассат.

Йис пора эдты сита шоши мир хоятат уддат. Тураман мийм хорам, тащаң муван там пора унты удапсайдад, сирдад-пищдад шавидат па едды тудат.

> Альбина Тырлина ханшам потар



Меңк ики па ханты

Йис порайн Ай Ас унт пелакн утща меңк ики ус. Щалта Ай Ас уйт пелакн па утща щирн ханты ху паварт хот дуведа омпсас. Кашң ики дув щиралн Асан худ каншал, унтатн вой ведпасдал. Щиты хатд етшал, ата йил па ядап хатда питал.

Имодтыйн меңк ики щимащ номасн ёхатда: «Утща шеңк марэм, ма Ас тумпелак икем хоща яңхдам-са па дувед кастыя хущдэм. Дув, ванта, ма пидэман хун верыттад-са, унт ики араткем юр ходща вутад. Хун па ма нох питдам, щи порайн там Ай Асэм унт пелак па уйт пелак иса тадаңтэдн ма мувдама-йиңкдама йидңан». Щи номасдад пидн таки-сары унт ики

хотал элты ким этас па Ай Ас па пелка сора-сора ун курамн шушмас.

Ешауд меңк икен ханты хот овада ёхтас, такан хоплэмоман, ёхи доңемас, вуща верас. Щадта тумед касты вера хущты щи питщасды:

- Хидые, ма ведпасдаты тахайдаман тампуш щикем артан вудэт па хорат яңхдат. Мин дудан ияха дапат хор веддаман. Щитдаман нох хордадаман, кавартдадаман. Кавартам юпийн нёхидад катна ортдадаман па ёхи дэддаман: хой сорашак нёхет ёхи дэд, щитэман нох питад! Щадта па хой ёхи хащад, щитэман мет куд наңк юха такан яртыя мосад. Ма ёхи хащдам ки, щит наң манэм ид ярдэн. Ясаңдам шоппи ант вуншмадам, ма тутэм тата щи дэд!

 Я-я-а, акем ики, щимащ касты вер манэма рахал, – ханты, япсыена нумасман, дуведа ёхлы ястал.

Щи ясаңдал юпийн хот эдты ким этдаңан. Щадта юхалдан валэмалнан, нёддан дэщатданан па ведпаса щи маныдылнан.

Хув муй ван кут ведпасдаман яңхдаңан па дапат хор щи веддаңан. Щиканща сохнадад нох хорданан, нёхидад ваньщданан па ун нёхи пут щи кавартданан.

Ешауд путан етшас. Щадта кавартам нёхет кат ики щирн ортданан па касты



щирн дэтыя щи питщаднан. Ин ханты дэты кутан тыед ёвадты нёхи — ты ёвадмад, тохед вощкаты нёхи — тохи вощкад. Меңк икен па нёхет ходыена ёхи дэдды, туп яма шаңкийм довдад и лота рыйдат.

Щиты кастан кутан ханты унт икеда такан увалтас:

– Акем ики, па ма щи етшасам!

Ин меңк икел па туп щиты ёхлы потартыйл:

- Хидые, ма па ходна дэдам. Еша ронасары, хащам нёхидам давемаддам! Наң па щи сысан вуды сох эдты такшак кед сэва.

Щиканща ханты нюки кед сэвас. Щадта ин меңк икен куд наңк юха яртыя питщас па дув антапкедад хоща ияха актам карты кед томан пидн шиядас. Щи карты кедад дув ищи курамн нох адэмасды, ин икед худам пуш кертман лап тувемасды па карты томанан щи кедад лап хатщасды.


Щиталн тыел-тохел ёвлам нёхилал паннэ сох хирата акатсалы, ай даңкар ухла ил хушсалы па ёхлы пела щи шушмас.

Хув муй ван кут щи касты верэд эдты хащас, па ханты меңк икед вантты сонтэмас. Тумед хот ова ёхатмадан, дувед щи шиядасды: ин ики дэрдад муйдадн куд наңк юх потам мув эдты хопитмад па щитад пидан ёхи щи тадасмад. Иса хотад ова ёхатмад па, такан эңадман, и лотан щи одад.

Ин ханты томанал пелки пуншдады, меңк икел нох эсалдады, па туп щиты дуведа ястал:

– Тадта едды ханты хоята, муваң-йиңкаң ар хоята омасты муй яңхты порайн, наң иса ад ёвартыя!

Мосаң щи ураңан, хантэт ин тамхатд унты там овс мувевн уддат-ходдат, меңкат па хуван туп монщат па йис потрат хоща хащсат.





Владимир Енов ханшсалды





Кашң аңкия

турмие ой ат мал



Аңки сам

Хоты юхат лыпат тайсат? Хоты дудн дув сёрхатсат? Дэрат ки дув ант па тайсат! Муй па Мув ки антом ус! Нявлак сэман Хатд вантад, Муйкем хошам куш ант тайд: Эви-пох сэма ант па питд, Мува Анки ант ки китл! Аңки сам! Муй сит симась? Сит хатд кинся хошмад ун! Калэл вуран вурты кинся, Сит ант соханты вутан юш! Муви удты мет так юр! Тынат кинся тынаң ут! Сит ханнэху удты дут! Аңки сам! Си па пирась ант ёхтылыйл. Си па вев ант донтыйд. Талта одаң дыл рув Пуншилылув муң! Тами кинся тынаң ут, Тами кинся каврам тут Нэмодт хунтты, Нэмодт артан Иса па мад антом Мув!

Мария Вагатова ханшсадды



Там сютсяты хатдатан хон мувев хуват аңки Хатл постала. Аңки - сит мет мосты хоят. Дув иса ванан уд, нётад, мосты ясан уятад па ястал. Хун аңкен ванан - самен аматал, ултыя кен.

Мет самана тайты хоятэва постам дуңтарат там лопасан пондув. Сам эдты манты ям номаслув ясталув. Тумтака па веськата удаты, хоттэд хоятданан шавиман ат тайдайты. Тумтак ёш па тумтак кур!

Ханты нэ

Хорам, ханшаң нови вайт, Мутра ханшаң вуды сахат. Лыптан, росэн ун охшамат, Питы нуйпи картэң сэват, Восты сэмаң ошаң веншен.

Рут ясанан сам ар тайдан, Сора, юраң, каркам курат... Нопсан, хорасан эви веншен; Хошам, нопсан яснат тайдан. Сорнең дуйтаң каркам ёшат, Тумтак, ошаң няврэм тайдат....

Асн вотан. Си нэ ёшат ант хурыман нык доваддат. Ими нопсан - ханты нэ, Дув – ма наем, ими – нэ. Наң урңенан там ар ханшсэм.

Даниил Китаев ханшсалды

Аңкема

Патлам атална роман дойдат юхат, Туп наң ант оддан, ма аңкием. Нэмем аңкие, наң иса ясталэн, Пойкащдан ма эдтэм иса, худдэм.

Муй ма версам дудан, Нан ки антом усан, Ма пуңдэман аңкие. Туп наң, аңкие, манэм турма альсэн, Па турам хота манэм тусэн.

Морман веншен ай тэдан уятдэм ма, Удапсаем вевтама ус. Век ант худатсам ма, нацен ацкие, Вевтама усам, ходдасан наң.

Охсохдан вотама йисат, Уйтдам, щит ма эдтэм. Ма нанен ястадам, анкие, Ин ма наң эдтэн нумасдам, пойкащдам, Едды тумтака па яма удтыя.

Ой ат мад турмие кашң аңкия, Пойкащты ясцат нох ат щащдат. Едды педа тумтака удаты, Кашн эви па похие.

Валентина Аляба толмащсадды



Издатель

Газета «ЛУХ АВТ»

Адрес редакции: 629003, ЯНАО, г.Салехард, мкр. Богдана Кнунянпа. д.1, каб.106 (34922) 4-68-63

E-mail: luh.avt@yamal-media.ru

Учредитель

Департамент внутренней политики Ямало-Ненецкого автономного округа (629008, ЯНАО, г.Салехард, пр-кт Молодёжи, д.9, каб.708)

Газета зарегистрирована

Управлением федеральной службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО 19 апреля 2012 года Регистрационный ПИ № ТУ72-00558

Тираж 1300 Заказ 1596 Полписные инлексы: ПА700, на полугодие – ПР561

№ 48 (1299) Газета вышла в свет 29 ноября 2025г. Подписано в печать 27 ноября 2025г. по графику: 16.00 фактически: 16.00 Газета выходит по субботам

Цена годовой подписки 88 руб., в розницу не распространяется

Департамент внутренней политики ЯНАО (629008, ЯНАО, г.Салехард, пр-кт Молодёжи, д.9, каб.708)

Отпечатано в АНО «Ямал-Медиа» Юридический адрес: 629003, Ямало-Ненецкий автономный округ. г. Салехард, мкр. Богдана Кнунянца, д.1, каб.106 Фактический адрес: 629007, Ямало-

Ненецкий автономный округ, г. Салехард,

ул. Чубынина, д.39А

Главный редактор Яковлева Аллина Кирилловна

Генеральный

директор

АНО «Ямал-Медиа»

Зулинова

Марья Андреевна